



A-N-T-I

Aliansi Nasional Timor-Leste ba Tribunál Internasional

(THE TIMOR LESTE NATIONAL ALLIANCE FOR AN INTERNATIONAL TRIBUNAL)

Sekretariadu; Asosiasaun Hak, kontaktu: lanrarradel@gmail.com, moniz@jsmp.minihub.org, atino@laohamutuk.org, +67077179655,
+67077402231, +67077432621

Komunikadu da Imprensa

KOMEMORA LORON KONSULTA POPULAR 30 AGOSTU 1999-2016 NO LORON INTERNASIONÁL BA EMA LAKON FORSADA

"Hanoin hikas pasadu hodi kontinua luta kontra impunidade iha Timor Leste no Mundu"

Povu Timor-Leste komemora tan loron 30 Agostu nu'udar loron konsulta popular ba dala XVII (1999-2016). Loron istóriku ne'e resulta ukun rasik an ne'ebé nakonu ho sofrementu ne'ebé mosu durante krime grave naruk ne'ebé komete husi militár Indonézia sistimaticamente.

Hafoin hetan ukun rasik an povu Timor-Leste moris iha estadu direitu no demokrátku. Infelizmente depois de tama iha prosesu ukun an nian laran, Estadu Timor-Leste hahu ho dezenvolvimentu ne'ebé foka liuba dezenvolvimentu fiziku no seidauk iha justisa kredivel ba krime grave ne'ebé perpetrator sira komete hasoru povo Timorense. Ukun na'in sira iha Timor-Leste too ohin loron nunka iha vontade di'ak ba asuntu justisa ba krime grave pasadu nian ne'ebé nu'udár aliserse ba estadu direitu demokrátku nian.

Aléinde ne'e, iha loron 30 Agostu komemora mós hanesan loron Internasional ba ema lakon forsada, familia sira ne'ebé lakon no família sira nafatin sei moris iha miseravel nia laran. Familia barak kontinua halerik no ezije ba sira nia ema ne'ebé lakon durante periódus konflitu nia laran. Sobrevidente, ativista direitus umanus no komunidade internasional kontinua hein no ezije akutabilidade husi kriminozu sira no justisa ba sira hotu ne'ebé buka inklui vítima no família vítima sira.

Too ohin loron, liu tiha dékada ida, impunidade nafatin eziste no nia konsekuénsia hatudu momoos hela. Realmente hatudu katak Governu Indonézia proteje kriminozu sira husi akuntabilidae krime ne'ebé sira komete iha Timor-Leste. Aat liután mak governu Indonézia fó oportunidade no fó fatin ba autór krime grave hodi asume pozisaun importante, ne'e hatudu katak Estadu Indonézia haburas impunidade no fó fatin atu krime sira ne'ebé akontese iha pasadu kontinua repete.

Tanba ne'e liuhusi eventu importante rua ne'e, ANTI hakarak apela no ezije atu:

1. Governu rua (Timor-Leste no Indonézia) ho seriedade hodi hahú estabelese Komisaun ba Ema Lakon hodi trata asuntu ema lakon forsadamente durante okupasaun ilegal Indonézia nian, nune'e bele re-integra fali ema sira ne'ebé militár Indonézia halakon forsadamente ba sira ninia família;
2. Ezije ba Nasoins Unidas atu hahú tau agenda no diskute relatório Komisaun Inkéritu Nasoins Unidas nia no KPP-HAM Indonézia nian, espesialmente rekomendasaun Tribunal internasional ba kazu krime grave iha Timor-Leste. Tanba laiha mekanizmu doméstiku ida inklui iha Timor-Leste no iha Indonézia mak fornese no garantia justisa ne'ebé justu ba povu Timor-Leste, umanidade internasional liu-liu ba família vítima sira.
3. Ba Konsellu Seguransa ONU, atu mantein no konsisten ba desizaun kontra impunidade bazeia ba akuzasaun husi Painel Espesial ba Krime Grave iha tinan 2003 no buka mekanismu efetivu hodi asegura akuntabilidade ne'ebé kredivel husi autór kriminozu sira partikularmente akuzadu eis Jeneral Wiranto no eis jenerais sira seluk ne'ebé inklui iha lista akuzasaun husi Painel Espesial ba Krime Grave iha Timor Leste;
4. Husu ba estadu Timor-Leste atu asina no retifika konvensaun Internasional kona-ba protesaun ba ema hotu husi halakon forsadamente nune'e bele hahú prosesa kazu ema lakon forsada no labele repete fali asuntu ne'e iha futuru;
5. Husu ba Governu Indonézia atu respeita prinsipiu direitus manus atu la-bele taka dalan ba justisa ba kazu krime grave liu-liu prosesa ema lakon forsadamente iha Timor-Leste nune'e hahú hametin relasaun bilateral entre estadu Timor-Leste no Indonézia ba oin ne'ebé bazeia valores direitu manus universal; sira.
6. Husu ba PDHJ no Komnas-HAM Indonézia atu servisu sériu ba akordu ne'ebé organizasaun rua ne'e estabelese liu-liu kona-ba ba ema lakon nune'e bele buka tuir ema sira ne'ebé lakon durante okupasaun militár Indonézia nian.
7. Husu ba Governu Timor-Leste, liu-liu Ministériu defeza no seguransa atu uza rekomendasaun sira husi *Chega* hanesan referénsia ba planu empeñamentu forsa seguransa rua, nune'e la repete tan krime sira ne'ebé komete husi Militár Indonézia durante okupasaun.

Dili, 29 Agostu 2016

Sisto dos Santos
Koordenadór Board ANTI